



Slakken

Tomke zit op de trekker, Romke in et karregien.
 Ze zullen naor Yana Yu.
 As ze op et pattien rieden heurt Tomke: KRAK!
 Romke ropt: 'Oe, Tomke! Ie bin over een slakke
 henne reden!'
 Tomke bekikt et platte pakkien. De slakke is dood.
 Dan zicht hi'j naor et pattien.
 'Hier kroepen nog vule meer slakken.'
 Slakken mit een husien op 'e rogge.
 Slakken zónder husien.
 Ze rieden vlogge naor Yana Yu.
 Tomke vertelt van de slakken op et pattien.
 Yana Yu ropt: 'We moe'n die beesten helpen!'
 'Hoe dan?,' vragt Tomke.
 'We moe'n ze naor een veilig plakkien brengen.
 Ik weet al wat!'
 Yana Yu pakt een emmertien uut et hokke.
 Dan draeven ze rap naor et natte pattien.
 'Wat een protte slakken!,' ropt Yana Yu.
 Tomke zegt: 'Doe ze votdaolik mar in et emmertien,
 Yana Yu.'
 Yana Yu begint drekt.
 Hup, daor ligt al een slakke in et emmertien.
 En nog iene. En nog iene.
 Tomke staot d'r naor te kieken.
 Eins vint hi'j slakken hielendal gien lieve beesten.
 Yana Yu ropt: 'Ie moe'n ok mithelpen, Tomke!'
 'Ja -a,' zegt Tomke.
 Hi'j gaot mit zien haand naor een slakke.

Wat zicht zoe'n beest d'r griezellig uut!
 Zo wiek en plakkerig.
 Mit van die malle stokkies op 'e kop.
 Staorig trekt hi'j zien haand weeromme.
 Yana Yu zicht et. Ze lacht.
 'Durf ie gien slakke beet te kriegen, Tomke?'
 'Jaowel, heur,' zegt Tomke stoer.
 Dan krigt hi'j een idee.
 Die husies, die lieken niet zo glibberig.
 Hi'j zegt: 'Ik doe de slakken mit de husies.
 En ie de aanderen, goed?'
 Yana Yu nikt. 'Okee.'
 De slakken willen weer uut et emmertien kroepen.
 Romke drokt ze mit zien potien weeromme.
 'Niet d'r uut kroepen jim! Zitten blieven.'
 Nao een posien bin de slakken op.
 Ze legen et emmertien een aentien veerder
 in et grös.
 De slakken kroepen rap vot.
 Tomke, Yana Yu en Romke bin bliede.
 De slakken bin redded!

